

具由奏聞可也

癸卯掌樂院啓曰鍾律制作非輕歲久殘缺聲音不諧當祀享朝會之時聽聞未安故啓請補其殘缺而已開局之後通校

宗廟永寧殿昌德宮景福宮所藏鍾石磬則不但殘缺各律差訛者居多社稷文廟則元無所藏臨祀移用積漸殘缺故不敢計其功費准數造作分藏兩處且兩闕補缺鍾磬今試更考清濁高下自不相協此係迎詔宴使時所用實關華人聽聞並宜一新協律以存國體只是年凶恤費仍舉重役未安當竢稍稔可以訖功而但新舊不可不辨新造鍾磬皆刻年號以備識別敢啓傳曰知道禮樂有關於國家音律清濁高下之不協豈徒有關於華人之聽聞乎姑待年稔改造

甲辰夜乾方巽方如火氣